

Միւս կողմից, բուլշեւիկները քարոզչութեան ազդեցութեան տակ ծայր տւին զինւորական անկարգութիւններ ճակատում ու թիկունքում: Յունիս ամսին Երևանի զինւորները փորձ արին կողոպտելու քաղաքի շուկան. թաւանեցին մի քանի խանութներ, և հազիւ յաջողեց աղէտի առաջն առնել: Նման, տեղական բնոյթ կրող խռովութիւններ եղան և ուրիշ վայրերում:

Սակայն, դրութիւնը սկսեց սրւել և սպառնական բնոյթ ստանալ 1917 թւի աշնանը, մանաւանդ, հսկտեմբերեան յեղաշրջումից յետոյ, երբ բուլշեւիկները քայքայեցին ռազմաճակատը և ռուս զօրքը քաշեցին դէպի թիկունք, որի պատճառով ճակատի պաշտպանութեան հոգսը ամբողջապէս ծանրացաւ հայերի վրա: Իրբև հետեւանք այս դրութեան, իշխանութիւնը Երևանի նահանգում հետզհետէ անցաւ հայերին, ռուս զօրամասերին փոխարինեցին հայկական մասեր, զանազան կէտերում սկսեցին կազմւել նոր զօրամասեր և այլն: Քաղաքացիական իշխանութիւնը ամփոփեց Երևանի Հայկ. Ազգային Խորհրդի ձեռքը, իսկ զինւորական գործերը վարում էր Անդրկովկասեան Կոմիսարիատի կողմից նշանակւած հայկական զօրքերի կոմիսար Դրօն, որի գլխաւոր հոգան էր զօրամասերի առողջացումն ու մարտունակութեան բարձրացումը:

Երևանի Ազգ. Խորհուրդը, որ կազմւած էր Թիֆլիսի Հայոց Ազգ. Խորհրդի ձեւով՝ կուսակցութիւնների ներկայացուցիչներից, իր գոյութեան սկզբի շրջանում, անգոյն և անջիղ մարմին էր, որ գնում էր դէպքերի հոսանքի յետեւից: Ինքնուրոյն նախաձեռնութիւնից գուրկ՝ շարժւում էր Թիֆլիսից եկած հրահանգներով: Նրա մէջ մտնում էին թեմական առաջնորդ Խորէն եպ. -ը, Մ. Մուսինեանը (անկ.), Գր. Տէր-Պաշտարեանը (ժող.), Դ. Զուբեանը (ս.-յ.), բժ. Գր. Տէր-Յակոբեանը (ս.-յ.), Մ. Յարութիւնեանը (դաշն.), Ա. Աստուծատրեանը (դաշն.), Թ. Նիկողոսեանը (դաշն.) և այլն:

Երևանի Ազգ. Խորհուրդը կեանք ստացաւ միայն 1917թ. դեկտեմբերի վերջերին, երբ Թիֆլիսից եկաւ Հ. Ազգ. Խորհրդի լիազօր ներկայացուցիչ Արամը: Ազգ. Խորհրդի առաջին իսկ նիստում նա տւեց ընդարձակ զեկուցում ընդհանուր քաղաքական դրութեան ու Թիֆլիսում տիրող մտայնութեան մասին և յայտարարեց, որ ո՛չ մի տեղից չկայ և ո՛չ մի յոյս. պէտք է լարել սեփական ուժերը՝ ապահովելու համար ճակատն ու թիկունքը: Եւ առաջարկեց անմիջապէս վերակազմել Ազգ. Խորհուրդը, ընտրել փոքրակազմ ու դիւրաշարժ մի մարմին՝ տալով նրան արտակարգ իրաւունք գործելու Ազգ. Խորհրդի գծած սկզբունքների սահմանում:

Ազգ. Խորհուրդը միաձայնութեամբ ընդունեց Արամի առաջարկը և ընտրեց Ազգ. Խորհրդի իրաւունքներով մի մարմին՝ Յատուկ Կոմիտէ՝ տալով նրան երեք ամսով գործելու կատարեալ ազատութիւն: Երեք ամսից յետոյ նա զեկուցում էր ներկայացնելու Ազգ. Խորհրդին, և վերջինս, ի հարկին, կարող էր երկարաձգել նրա լիազօրութիւնները կամ լուծել: Յատուկ Կոմիտէի մէջ ընտրւեցին Երևանում մեծ յարգանք վայելող հասարակական գործիչ Մկրտիչ Մուսինեանը, որ այն ժամանակ ո՛չ մի կուսակցութեան չէր պատկանում և միայն 1919 թւին մտաւ Հ. Յ. Դաշնակցութեան